

Tut ils umans vegnan creads aduals

Gruppas discriminadas sa fidan d'Obama

■ (gsc) «Sch'i dat in uffant en la vart sid da Chicago che na sa betg leger, quai ma reguarda, era sche lez n'è betg mes uffant (...). Jau sun il pertgirader da mes frar, jau sun il pertgirader da mia sora: Questa cretta fundamentala fa che noss pajais funcziuna. Quai ans lubescha d'avair la mira da noss siemis individuals e da'ns unir tuttina sco in'unica famiglia americana: 'E pluribus unum' – blers vegnan in unic (...). I na dat in'America naira ed in'alva, ni in'America da lingua spagnola ['Latino America'] ed in'America asiatica; i dat ils Stadis unids da l'America (...). Faschain nus ina politica dal cinissem u ina politica da la speranza?» Quai

ha declarà Barack Obama a Boston ils 27 da fanadur 2004 avant la «Democratic National Convention». En quella allocuziun ha'l cità la decleraziun d'indipendenza dals stadis unids (4 da fanadur 1776): «Tut ils umans vegnan creads aduals, tuts han survegni tscherts dretgs inalienabels da lur Creatur; tar lezs dretgs èn la vita, la libertad e l'aspiraziun a la ventira.» Lez di ha'l ditg in cler «na» a «the politics of anything goes», la politica dal muntatuttina. Quatter onns pli tard (2008) l'ha il pievel dals Stadis unids elegì president cun 52,9% da las vuschs. La victoria da l'emprim president da derivanza africana ha lura stimulà sia cuminanza; lezza

ha dà perditga da sia luschezza cun contribuir a sia reelecziun ils 6 da november 2012 (91% da las vuschs «nairas»).

Il spagnol fa progress en ils Stadis unids

«Le Monde» (Paris) dals 8 commentescha: «El ha puspè mobilisà plis secturs da la populaziun: La giuventetgna creschida, las personas scoladas e salarisadas, la cuminanza da derivanza africana e quella da lingua spagnola (...) che na valan betg sco alvas (...). Mitt Romney avess gudagnà tgunsch senza las minoritads: Obama ha survegni mo 39% da las vuschs 'alvas' (...). Cunzunt ils 'Latinos' han fatg part a moda e maniera excep-

ziunala; oz fani ora 10% da l'electorat cunter 8% dal 2008 (...). I han dà 71% da lur vuschs ad Obama (67% dal 2008) (...). En il stadi da Nevada (Las Vegas) fani ora 18% da l'electorat; i han gidà Obama a cuntanscher la maioritad en lez stadi. Quai constat er en Virginia, Nov México e Colorado, nua ch'i possedan 14% da las vuschs; là han 75% d'els vuschà per Obama. En Florida ha l'electorat 'latino' (14% dal total) dà 62% da sias vuschs ad Obama.» Quest ha insomma survegni vuschs da gruppas che sa sentan discriminadas: 55% da las femnas e 76% dals umans omosexuals. «L'Hebdo» (Losanna) dals 8 concluda: «Ils democrats vegnan elegids da mino-

ritads che creschan e da femnas. Per ils republicans vuschan bunamain mo 'alvs' che represchentan mo pli 45% da l'electorat (...). Per la 'Tea Party', per ils 'rednecks' ('alvs conservativs') dals Stadis unids dal vest, schizunt per ils sontgets mormons è Obama 'quel benedi negher socialist', in um che spretscha lur idea da las valurs americanas» (p. 20). Tgi che vul candidar il 2016 per la successiun d'Obama duess en mintga cas emprendre spagnol. Forsa per chattar il temp da far quai ha Hillary Clinton decidi da sa retrair dal ministeri da l'exteriur. Vistas avess'la segir da vegnir l'emprima presidenta federala en l'istorgia dals Stadis unids. Tgi sa?